

每週經課朗誦經文（巴克禮台語漢字）2015/04/05

共同經課-1 使徒行傳十章三十四節～四十三節

34 彼得開嘴講：「今我真正知上帝無用外貌取人。35 獨獨佇逐邦國見有敬畏伊、來行義的人互伊歡喜接納。36 上帝所寄互以色列子孫的話，對耶穌基督來傳和平的福音（伊是萬有的主）。37 此個消息恁知是佇約翰所傳的洗禮以後，對加利利起，到遍猶太。38 就是拿撒勒人耶穌，上帝有怎樣用聖神及才能抹伊。伊就四界行，做好事，醫好見若魔鬼所壓制的，因為上帝及伊佇啲。39 見若伊佇猶太人的地方及耶路撒冷所行的，阮做干證。人就吊伊佇柴裡來害死伊。40 到第三日，上帝互伊復活，續出現；41 嘅是互眾百姓看，是互上帝代先所揀選為著伊做干證的人看，就是阮諸個佇伊對死人中復活的了後及伊相及飲食的人。42 伊閣命令阮傳互百姓，干證此個是上帝所立定，做活人、死人的審判司。43 眾先知亦為著伊做干證：『就是凡若信伊的人，對伊的名得著罪赦。』」

共同經課-2 詩篇一一八篇一節～二節、十四節～二十四節

1 恁著感謝耶和華，因為伊是好；因為伊的慈愛永遠佇啲！2 願以色列講：伊的慈愛永遠佇啲！14 耶和華是我的氣力，是我的詩歌；伊亦成做拯救我的。15 佇義人的布棚內，有歡喜的聲，拯救的聲；耶和華的正手施出大權能。16 耶和華的正手抬高；耶和華的正手施出大權能。17 我袂致到死，猶會活啲，續欲報揚耶和華的所做。18 耶和華曾嚴嚴警戒我，總是未有將我交佇死無。19 著給我開義的門；我欲入去感謝耶和華！20 這是耶和華的門；義的人欲入去！21 我欲感謝你，因為你已經應我，閣成做拯救我者！22 師傅所棄揀的石，已經成做厝角頭的石。23 這是耶和華所做的，咱的目矚看伊做奇怪。24 這是耶和華所定著的日，咱佇此日的中間欲歡喜快樂！

共同經課-3 哥林多前書十五章一節～十一節

1 兄弟啊，我互恁知我前所傳互恁的福音，恁所承受，所倚靠來倚在的，2 恁若執守我所傳互恁福音的道理，也嘅是空空信，就對此個得救。3 因為我所受來傳互恁的：第一，就是基督為著咱的罪死，照聖經所記載，4 閣有埋葬；第三日復活，也照聖經所記載，5 有出現互磯法看見，閣出現互十二個使徒看見；6 閣一擺出現互五百外個兄弟同時看見，其中大半猶佇啲，若是有的已經暈去。7 閣一擺出現互雅各看見，又閣一擺出現互攏總的使徒看見，8 上路尾也出現互我看見；我是親像未到月來生的。9 因為我是使徒的至微細的，袂堪得稱做使徒，因為我曾窘逐上帝的教會。10 總是我今成做此等號的人，是對上帝的恩才有，閣伊所賞賜我的恩嘅是空空。若是我比 in 眾人卡著磨；其實嘅是我，是上帝的恩及我佇啲的。11 按呢不論是我，抑是 in，阮乜按呢傳，恁乜按呢信。

共同經課-4 馬可福音十六章一節～八節

1 安息日已經過身，抹大拉的馬利亞及雅各的老母馬利亞及撒羅米，有買香料欲來抹耶穌。2 七日頭一日真早，日抵仔出，in 到墓，3 相及講：「是誰仔欲替咱翻彼塊石離開墓門啊？」4 抬目就看見，彼塊石已經翻開，因為是真大塊。5 入墓，看見一個少年人坐佇正旁，穿白衫，就印愕。6 少年人給 in 講：「嘅免印愕！恁是尋釘十字架的拿撒勒人耶穌，伊已經復活，無佇遮。你看，伊埋葬的所在。7 今著去給伊的學生及彼得講：『伊代先恁去加利利。恁佇遐欲看見伊，照伊所給恁講的。』」8 諸個婦仁人出去，離開墓就走，因為愕愕懶印愕，也無給人講甚麼，因為 in 真驚。